

總目冊

李炳南老居士全集總目錄

李炳南老居士全集編輯委員會 印行

普為出資及受持展轉
流通者回向偈曰

願以此功德 消除宿現業
增長諸福慧 圓成勝善根
所有刀兵劫 及與饑饉等
悉皆盡滅除 人各習禮讓
一切出資者 展轉流通者
現眷咸安樂 先亡獲超昇
風雨常調順 人民悉康寧
法界諸含識 同證無上道

國家圖書館出版品預行編目資料

李炳南老居士全集/李炳南老居士著述

再版-臺中市：青蓮 2006 [民95]

冊 公分

ISBN 957-99388-2-2 (總 目 冊：精裝)

1. 論叢與雜著

078

95001524

李炳南老居士全集序

吾師稷下 雪廬老人，早年習儒業，淹貫諸經，旁及子史法學醫學，尤深於詩。其後入佛，學唯識於南昌梅頤芸光義大士，皈依淨宗十三祖印光大師，又從明師參禪學密，最後發大悲心，自行化他，專宗淨土。

師嘗為仕於苦，總加於民，功昭於世，惟志不在人爵，乃與莊太史心如圓纂苦志，事成，入衍聖公幕，孔上公尊其賢，待之以殊禮。

民紀己丑之春，師從上公浮海臺灣，遂寓臺中，達數十年，

身似孤僧，全心弘道。以釋典儒經詩文醫術接引群機，同修淨業。次第興建臺中佛教蓮社、慈光圖書館、慈光育幼院、菩提仁愛之家，設立國學班、念佛班、男女青年弘法團、明倫社、大專佛學講座、內典研究班、論語講習班、社教科、國學啟蒙班、明倫雜誌社、明倫廣播節目供應社、青蓮出版社、暨各種文化慈善事業基金會，弘化規模日大，影響深遠。

師在各道場弘佛弘儒，並應聘各大學暨獨立學院，講授詩禮醫學，數十年如一日，晝夜講說無虛時。傳授儒經，以道德仁藝為綱，基於倫常禮教，期諸學者樂天知命，修己安人。披演內

典，必依祖注，契理契機，指歸念佛，助以深信因果，務求當生成就。言教所至，身教先之。感人至深，度化無數。匡廬遺業，靈巖道風，由是大弘於此域。人心向善，世德日淳。不惟佛日增輝，而夫子之鐸亦以是遠振他方矣。

歲丙寅，夏曆三月初五日寅時，師應前一年預示，法緣已了，無疾歸西，春秋九十有七。臨去之際，猶囑助念諸弟子，一心不亂。七七日後荼毘，得諸色舍利千餘顆。生前經注、講表、詩文、著述甚多，或已梓行，或存手稿。依於治喪會議，彙印全集，以澤後世。事經兩稔，方竣其編。類分佛學、儒學、醫學、

詩文、遺墨、書牘，後哀追思諸文以附。

師平生大願誠於中，化度之功著於世，凡所為文，無非利眾。其為佛學儒學之類，固皆智悲雙運，弘護兼施，可為離苦之良導。即如醫學詩文，亦是圓融道藝，興人出塵之思。故由各類之文，悉見師之悲心弘願。嗟夫，吾師雖去，吾師之心願猶在人間。全集行將陸續付鐫，編輯同人命序其端，不敢辭以謙陋，謹述事要不文以應之。

中華民國七十七年戊辰五月弟子周家麟、徐醒民敬識

編輯例言

先師 雪廬老人，畢生弘道，旨在啓人覺悟自心，由是希賢希望。人之自心，即中庸所云之天性，亦即佛法所云之眞如本性。是性人人本有，非生非滅，覺之可以了生脫死，可以爲堯舜，爲孔子，爲大覺之佛。民紀第二丙寅暮春之初，先師此生弘化圓滿，以九七高齡歸西安養。諸弟子哀師之注經講記與詩文，分類梓行，久已流通海內外，今就原集增廣付梓，全集分爲十九類，卷帙甚繁，宜先識其要。

一、佛說阿彌陀經摘注接蒙、義蘊合刊。此爲抗戰時期，師在重慶之著述⁵。是時應講席之需，師以彌陀疏鈔擷補爲藍本，兼采要解及其他諸注，編述而成。接蒙之編，雖曰接蒙，實則其文簡明有本，久脩之士，依之研究，亦甚適宜。淨土法門，當生成就。持名一法，普被三根。此經專說持名，文簡而顯，義豐而

微，性相律密，藏通別圓，皆蘊其中。古今注釋雖多，要須會意於文字之外。義蘊之編所述，專爲含蘊而發，故以義蘊名編。脩學之士閱之，須與摘注或他注合觀，方解所云之意。

一、大方廣佛華嚴經講述表解。此爲八十華嚴經，自世主妙嚴品，至十回向品，依清涼疏鈔，編列表解。師自民國五十七年，歲次戊申，正月中浣起講，至民國七十五年，歲次丙寅正月中浣，十回向未講完。故講表亦止於此。

一、講經表解。初名聽經筆錄，編入全集時，定爲此名。內有妙法蓮華經、維摩詰所說經、華嚴經普賢行願品、首楞嚴經、圓覺經、法華經觀世音菩薩普門品、楞嚴經大勢至菩薩念佛圓通章、金剛經、心經、仁王護國經、地藏菩薩本願經、八大人覺經、四十二章經、佛遺教經、阿彌陀經、大乘無量壽莊嚴清淨平等覺經、無量壽經、觀無量壽佛經、往生論、起信論、阿難問事佛吉凶經、以及師在臺中早期教授諸弟子學講之諸經。師所講說

之經論，遍及諸宗義理，其要則如印祖所云，千經萬論處處指歸淨土法門，以期學者當生成就。

一、大專佛學講座初級教材。師爲大專在校學生開辦佛學講座，在寒暑假期，集中講習於臺中。此爲初級教材，分爲六種，由師自編講表，實施講授。一爲佛學概要十四講表。自初學至成佛，學有次第，法門有通有別，爲初聞佛法之基本教材。二爲八大人覺經。後漢安世高譯。此爲早期來華之內典，文簡義豐，大小乘法皆有之。師列講述筆記，經文中覺悟覺知之義，辨之甚明。三爲唯識簡介，代表相宗。四爲般若心經，代表性宗。五爲阿彌陀經，專說持名念佛之法。六爲普賢行願品。此說普賢菩薩以十大願王導歸極樂。六種教材，除行願品外，餘五種皆由先師編著表解，配合講述，初機學者可入學佛大道。

一、弘護小品彙存。此爲師在臺中早期弘法護法之小品文集，分十二類，弘法之類居多。護法之類，有駁外道之毀謗佛教

者，有據教理嚴辨佛魔者，如是而已。弘法類中，有內典講座之研究，實用演講術要略。此二書爲師多年講經說法之經驗談，原爲傳授弘法弟子而撰，後編入此集，以利一切有志弘法之學者。

一、佛學問答類編。分上中下三集。上集通問。中集析疑、質難、因果、持戒、名相。下集脩持、唯識、禪觀、心性、密宗、淨土。問者有初機，有久學，有外道。問有淺深邪正之殊，答則契理契機，一本於智悲雙運。讀是編者，深得破迷啓悟之益。

一、佛說四十二章經表注講義。師於民國五十八年講於太虛紀念館善果林。此經來華，緣於後漢明帝夜夢金人，覺問朝臣，知西域有佛法，遣臣前往尋求，得高僧迦葉摩騰與竺法蘭二人，暨梵文經藏回洛陽，遂請二僧於白馬寺譯爲中文。初期譯法，取其簡要，但譯四十二章，即以名是經。表注講義契理契機，時賢讀

之，有助於深入經藏。

一、佛說大乘無量壽莊嚴清淨平等覺經眉注。無量壽經漢譯有十二本，宋元以後，僅存五本。此爲夏蓮居老居士會五本而爲一，前有黃氏序，以及梅大士序，謂自宋至清，有先賢王彭魏三種會本，皆不若此本之完備。先師雪公於民國三十九年，以此會集本講於臺中靈山寺，有眉注，復有經旁小注，甚爲珍貴。另有講表，編入講經表解中。

一、脩學法要正續編。正編中又增往生問答等四篇。此是先師爲學者開示脩學之法要，由諸弟子記錄而成，編爲正續二集。其中以脩淨業爲主，並闡帶業往生之理。又有一部分闡儒學要義。脩淨研儒，咸宜讀此二集。

一、雪廬述學語錄。由弟子筆記爲短文，嘗連載於明倫月刊，後裒爲此集，計一百九十一篇。文散不相聯屬。內容述及華嚴、般若、淨土、論語、大學、中庸、禮記諸經論，語顯義

深。學者行有餘暇，信手展閱，當有會心之樂。

一、論語講要。師在晚年，爲培育弘儒之士，乃成立論語講習班，定期講習。此爲師講授論語之言辭，由弟子筆記成書。論語乃至聖先師孔夫子言論記錄。夫子與諸弟子談學論道，或答時人之間，語及詩書易禮諸經，莫不指出精要之義。自古學者，其欲讀經，學爲聖哲，莫不自論語始。師講論語，於漢宋諸注，各取其優，不存門戶之見，諸注所未及者，則考據諸經以說，且多就形而上者發其義蘊，書名講要，蓋有別於古今諸注焉。

一、禮記選講。先師講經，不寫講稿，只編講表，或就經本加以眉注，以及經文之旁加以小注。講時廣應眾機，聞者各得其解。師所選講之禮記，篇目甚多。此集初爲曲禮、禮運、學記、樂記、中庸、大學諸篇。尙有月令篇講表後來加入。

一、中國歷史綱目表。先師爲內典研究班講授中國歷史時，編此講表。自三皇五帝至唐五代，是師所講之課程。表列歷代興

亡，人事成敗，其事其理，一目了然。

一、莒縣志編纂。莒在周朝爲少昊封國，今爲山東省莒縣。原有縣志，散軼殘闕。民國二十三年重脩，閱三年完成。總纂爲莊太史心如，分纂及與其事者，皆是鴻儒，先師居其首。民國六十九年，是志景印于美芝加哥大學圖書館，由莒縣人士在臺重印。舊日脩志諸儒，時唯先師一人而已。今以師分纂之諸篇印入師之全集，資紀念耳。

一、詩階述唐。此是先師在中興、東海教授詩學之著述。內分四類，一爲學詩先讀求味，二爲聲調舉隅，三爲詩惑研討隨筆，四爲鱗爪概談。合此四類，而曰述唐者，師嘗言之。謂詩在於唐，蘊發奇彩。凡學中國詩者，莫不涉入其範。此編之意，非提倡學唐人之詩，乃爲喜學唐詩者提供參考。然人雖喜讀唐，而知唐者少，故不入其奧。知之者，而又泥不知變。是故此編乃將唐人通法擇要舉出，俾初學知非率爾，故曰述唐。師雖謙言通

法，實則學唐詩，以至學唐以前之古體詩，莫不由此而入門，而升堂奧。尤以詩惑研討、鱗爪概談，雖舉唐詩例說，而欲深研唐詩與歷代古詩者，捨此則無由問津矣。

一、雪廬詩集。先師畢生所作之詩，有古體，有近體，篇什豐贍，難以計數。以類分之有六，曰，燹餘稿、蜀道吟、還京草、發陳別錄、浮海集、辛亥續鈔，後附雪窗習餘。六類之作，因時因地，不一其名，辭情亦異。師自例言，燹餘稿其辭多憤，蜀道吟其辭多怨，還京草其辭多憂，發陳別錄辭無類，浮海集其辭多哀而放。辛亥續鈔作於師年八十以後，師謂此時，興觀群怨交感於中。是以感懷之辭又甚於前。虞書詩言志，三百篇孔子曰思無邪。志者志於道，漢儒讀無邪爲無虛，謂詩三百篇，皆出於真情，而無虛言。言之無虛，是謂言志。先師之詩，其辭多憤、多怨、多憂、多哀而放，悉出於悲天憫人之心。言無虛發，有至誠之道蘊於中，可以前知天下事，可以盡人之性，盡物

之性，以是憂人之未憂，哀人之未哀。而曰放者，自有爲人解憂解怨解哀之道。是道也，五經有之，三藏有之。經藏之道咸在人心，讀師之詩可以啓發。由是言之，雪廬詩集，豈尋常詩集也哉。

一、雪廬寓臺文存。此集之文，凡九十五篇。其中文言七十六篇，語體十九篇。多爲各家重印經書或新著之序。是經是著之要義，讀是序乃能得之。諸弟子爲師八秩祝嘏時，以此與師之詩集合刊，後單行，今入全集。

一、黃帝內經選講。中國醫藥大學，其前爲中國醫藥學院，聘師教授黃帝內經，此即先師所撰之講義。內分二類，一爲素問表解，一爲內經素問摘疑抒見。表解簡明扼要，摘疑抒見，甚解古注之疑，皆是難得之著述。

一、雪廬老人題畫遺墨。師返寂光十稔，臺中蓮社，與諸聯體機構，集會紀念，並以諸蓮友家藏師之題畫遺墨，展於雪廬紀

念堂。展畢攝影編印此集。題畫或遺墨，多爲先師書以自作之詩，可謂詩書畫三美皆在其中。

以上十九類，皆是先師弘道之法要。約而言之，應機而說，有此類分，平等指歸，則是信願持名。師雖西歸，法留人世，恆利眾生，師之悲心深矣。